

肥鄉縣志卷三十五

藝文

記

重建成信侯殿記

元新安方虛谷

託孤之難未若立孤之難也幼而長之宗祐危而安之託孤固難死而生之血食絕而續之立孤尤難周成王十三踐祚姬旦攝政四國流言七年而復子明辟此所以幼而長之以安宗祐之危難矣哉夏羿浞之變后緡方娠自竇而逃一成一旅遺臣靡立少康不失舊物此所謂死而生之以續夫血食之絕不示難之尤難者乎是故漢霍光擁佑昭帝保養幼

主謂之託孤功爲大不如丙吉張賀有恩于宣帝垂死而生可謂之立孤德爲大今廣平府故洛州肥鄉縣春秋時立趙孤近世封成信侯程姓嬰諱之里也周簡王之三年晉景公時屠岸賈攻殺趙同趙括趙氏盡矣而趙武者趙朔之庶子也侯與公孫杵臼謀而藏之後祁奚韓厥言於景公復立趙武史記晉趙世家春秋內外傳劉道原通鑑外紀所書不同然成季之勲宣孟之忠若一髮懸于鈞迄至于今有社稷不墮皆誰之力歟肥鄉

也則肥鄉之人祀之又豈止一

鄉一國之增歟厥後江南侯有廟甚盛曰祚德封爵又不止此肥鄉如故南北異也侯之後世居肥鄉程君玉欲新

侯廟不果蔣君思爲玉養子繼父志一新之穹殿四楹雕飾完備元貞初元孟秋鳩工葺年落成用中統楮幣爲錢百五十萬有奇其里人省郎王君英求記其事夫食人之祿存亡繼絕忠臣也程侯宜書爲人之後肯乃堂稷孝子也蔣君思亦宜得書是爲記

余公河記

明漳浦葉期遠

余公河作於余公也按郡志肥鄉其地平行而中漥時雨澇則諸水滙而無所洩居民往往病之歲癸丑公蒞肥五月雨六月大雨至秋八月溢陽河溢東出柳林口漫流至辛安鎮又潰而東北至焦家營南至張達等村瀾灩鄉落百里皆爲

渠沼田在水中浮直棲於屋廬民病於昏墊顛顛然無人道
生理令至而憐之乃垂桴入諸水鄉民之望救者相率而號
于水滸令屬耆老而謀之僉曰惟有鑿河洩水耳令遍歷形
勢至王固村得漳河故道其勢迤邐可以容洩諸水度林麓
井里有墳墓廬舍者避之可徙者徙之遂決疏鑿之計因白
於兩臺郡司俱報可遂計儲峙具餼糧誓於衆老少壯弱執
畚鍤而事者五千餘人鋤鏤昇負無敢或緩蓋民苦于患故
樂于趨事而不自愛其力也河起自張達村至王固村遂通
盜陽河長四十餘里廣凡八步深九尺河之上築土爲堤長
與河寬經始於八月之朔底於十月之望潢潦既導渠沼既

涸淤淖旣平民乃藝麥工暫輟逾年春二月復申令以成厥
工民爭赴之按臺馬公令計口授糧令曰未可以發我公芻
令贖罪者輸粟得六百石凡十日河乃成是夏又雨桑棗禾
稼俱沒予適有事大名抵河之澚河之北民戚戚咨嗟咸屏
足而倚河之南艤舟來渡若有德色旣渡居民嬉聚自若予
恠而問之舟者進曰在昔未有斯河也吾曹與彼民俱溺自
余令鑿斯河從滏陽達天津水不爲患故東南之民瘳也予
作而嘆曰尋丈之間而豐撈異抔土之力而憂喜殊安得他
令如余令能使彼民如而民耶衆皆稽首而請名予曰河作
于余令名曰余公河亦可民悅而信之乙卯秋予以內艤將

東歸邑之士紳走幣請記予謂警除民患者勤於民而無所
厲於時余令之令茲土順民情而不拂承天時而弗違因地
利而不悖勞民力而弗墜用民財而木費苟非仁人君子其
孰能與於斯宜乎民之念之也昔召信臣作陂以溉田而民
名之曰召公陂蘇子瞻築堤以捍海而民名之曰蘇公堤天
下至今稱之然則余公河之惠民固當與召公陂蘇公堤同
垂不朽云余公諱炯字德彰別號蒙溪

修城記

梁 桐

初孽臣導黃台吉寇京師飛檄報警邦畿地勢坦直無關塞
山河之險可據守民相視心如野鹿欲犇散撫臣深憂之已

而督守令修城池築墩堡以壯形勢以固人心至慮也所在類以空文還應鮮爲國任事者茲舉也闕政機繫民命於乎可如此玩侮哉我縣令潘公屬僚與民而告曰肥去京師僅一千里是故當設備縣土城水溝不具雨積輒圯壤勞築防守角舖四制度頽陋 非樓無以張威吾將剏爲之四門

樓瓦桶年遠頽折難障風雨無閣板不可登望吾將修補之厥庫儲蓄脩調支吾不敢耗歲歉民艱苦吾不敢重歛將作窶取築城廠柴陶磚贈罪金足財用茲八月肇事僉曰俞旣而果得磚若干灰若干板若干木若干作水溝餘四十條角樓四座門樓加修飭各鑿兩側壁開窓便用矢石四越月事

竣爲嘉靖壬子冬十一月翼翼乎壯哉縣與縣屬廣平府亦土城前太守封邱陳公徂大聚磚石砌之形勢壯如虎蹲豹變巍然爲名股肱郡足以羽翼京師公力成此役是爲郡增羽翼也守令真得人哉公號西峯名鑑六安人儒業世家性溫而毅政和而仁大得民和

崇德書院記

明郭崇嗣

勺溪李公之治肥也敦本尙實不炫浮采諸所建立必定經久之制而振宣教化作興士類尤所汲汲焉予聞庠士言往邑長詣學與諸生不交談卒一揖而退或有牽於簿書不茶明倫堂卽鳴騶去者公朔望外仍約期會數進諸生命坐聽

講剖析義理商確性命議論雲湧多發學者所未聞諸生皆
人人自喜以爲得師已又念士之爲學非示之的罔定其志
非萃之所罔專其業乃謀建書院收邑俊而作養之地未卜
也未幾得宋相李文靖祠者在城西門內其地而離背乾幽
僻高爽周圍多隙地公閱之喜曰此真造士之所乎夫古書
院若白鹿睢陽岳麓石鼓稱最鉅矣而皆祀先賢爲主俾學
者有所瞻法文靖爲宋賢相其言行炳炳可師諸生固不必
遠有所慕矣乃卽其祠建號舍五十五區在祠之後者十五
在祠之兩翼者各二十取大學綱領條曰以標其楣祠前故
有兩齋各增以厦扁曰日新時敏祠南故有小亭改建講堂

三間扁曰克念號舍之四隅各室三間爲厨舍翼號之南尾
各室一間爲學舍貯穀以贍士設門子二名守之且供諸士
掃除之役合而名之曰崇德書院是役也朝夕督工者邑簿
郭君朝陽而醫官裴宗度佐之木植取諸鄉民瓦甃取諸陶
戶物料取諸市行皆平價給之凡費金若干則取諸帑餘贖
金未常一毫歛民民不知勞云工肇於庚午之九月至十月
終而工訖李公乃出其素養所得著爲困學纂言頒之諸生
以示規範而命予記其歲月於右予旣受命乃往觀焉第見
講堂巍啟列號 門垣厨庾罔弗嚴飭一瞻眙頃肅肅乎
若鉅公鴻儒正襟危坐於中堂而道德文章爲諸生之標也

彬彬乎若羣英列秀考德問葉于左右而鵬鸞鳳翥需國家
之用也乃喟然嘆曰偉哉我公作士之功其垂諸不朽者乎
夫明興二百餘年已令長蒞此土者何限豈無三四賢者稱
愜士論哉然不越考校勤禮貌優賞予渥耳人往而事卽湮
歲徂而澤亦熄其視書院之興士有永依世荷甄陶之惠者
何如哉噫諸士宜慶怵矣雖然作興者上之事奮勵者士之
功卽今厥功告完諸士來遊於此者如能繹崇德之義加克
念之功取纂言而諷誦之日而新時而敏惟德行是先不徒
工文詞以爲利祿媒他日出爲世用能樹炳烺之業是於聖
學爲克修於文靖爲無忝庶幾不負李公建院之初心矣假

令視爲嬉遊之所晨而入暮而出羣聚鼓頰以談人之是非
德業無聞而徒糜庾粟焉則自棄甚矣其何顏藏息於此哉
是則諸生之所宜自懼自省者故併及之李公名栻江右豐
城人舉嘉靖乙丑進士大司馬克齋翁子也器宇軒豁學問
淵源政事尤極精敏蒞肥甬葺化布澤流人心大悅書院特
其造士一端其他如行鄉約聯保甲興社倉公審編愛民節
財興利除害彰善癉惡之類不可縷數予別爲善政記刻之
俛循良者之採茲不多贅云

李公善政記

郭崇嗣

公名栻字孟敬號勺溪江西豐城人舉嘉靖乙丑進士家世

自唐末以來代有顯宦入我明科目尤盛其先公少保克雍翁負豪俊之才戡亂殲倭爲時柱石弟兵部見羅公與余同舉壬戌進士溫雅純粹尤稱蘊藉說者謂公資旣神奇又家學淵原有自故發之文章政事踔絕如此直哉公蒞任之始卽以廉儉節愛誓于神明每月朔望如之市中官價盡行革去里甲舖行無纖毫之擾日用蔬菜卽時給價米帛皆詣府市交易與本邑分毫無涉下車之初商肆大悅往民詞多滯而費公受詞不厭瑣細原告自拘到卽剖決小者量責逐出片紙不罰取供者卽面定罪名吏書一毫不預故訟者不費一錢各得輸情歡然帖服至于紙贖登報無遺邑故嘗行鄉

約率應故事公通邑立爲六十餘會挨門編爲保甲刊定規
約僉舉鄉宦士民耆德者爲會正每月各揭善惡赴邑聽行
賞罰由是奸豪斂迹賊盜潛消風俗爲之頓變公爲政以教
化爲先尤好作興士類每月三日詣學會諸生發明道德性
命之蘊皆根極理要醒人心目又卽文靖祠增修書院建號
舍六十餘間立學倉以贍貧士刊纂言以示學規邑士莫不
感頌邑民素鮮蓄積歲數災賑穀且盡公勸民無問貧富隨
心出穀積爲社倉以備荒斂且首捐祇候馬夫銀兩以爲衆
倡於是民皆樂從四鄉儲穀凡數千石邑歲俵大馬往年一
馬價且三四十兩縣司相沿舊習仍扣留馬價以充公用而

吏書黷醫馬販沾染及在京打點之費馬頭賄累不可勝言
公親自閱買價止二十餘兩而諸費悉革其餘銀具狀領出
湊買次年大馬公私大省凡節財八九百兩百姓無不感讚
大戶收糧及里長賄納多括火耗墜頭甚有收至加二者公
令戶頭收齊自納並無火耗等費且人給由票直書每畝該
銀若干里書不能欺騙民甚便之往歲編審均徭率憑書手
造報奸弊多端公親加磨戡榜令訐首毫弊難容花分而歸
併者一千八百九十餘戶飛詭而改正者七百九十餘戶出
佃而收回者五百三十餘戶欺隱而首出者十頃五十餘畝
宿弊爲之一清往審力差大戶諸役書役任賄低昂富輕貧

重公酌量參定輕重適均水鄉連災者率從輕緩榜出父老傳頌以爲公平前所未有邑有首出無糧地畝故皆徵銀寄庫以備堂支漫無稽考公申詳入冊定差并認學糧不復私費上下服其光潔邑故有健訟賄証官卒受欺者公明燭秋毫觸事卽首尾畢見有盜商遺銀于市市民得之首官商聞之自言分兩塊數詣縣索領奇兵聞商言卽如其言冒爭爲已銀人莫能決公密令庫吏如數易以官銀以示兵兵云吾銀也以示商商不認乃重責奇兵而以銀予商由是人稱神明莫敢欺蔽吏書皂役故皆出入衙門橫肆無忌公德威神明群輩悚息小過必懲稍干法度卽行革役非呼喚不得進

非給照不得出入公庭肅清無復打點之弊公持體清明而用心平恕問閭動息毫髮必知其素稱克惡者卽年遠必以法懲之然其人能澡行自新卽待之如故以是民皆憚于爲惡而樂于趨善公留意地方任事慷慨凡利弊有可興除者卽銳意行之本縣西南當漳滏二河之衝如邯鄲之燕米二口成安之寶公堤歲決爲害滄民地數十萬畝久議堵塞迄未能行公力主其議合四縣民力并爲堵塞且濬漳河俾復故道地方賴以免患公善政多端不能枚舉大率才廉公明四者兼備而一誠貫徹于中精神意氣又溢于政令之外故無感不孚無人不化風行草偃物阜民安三代之政不過

是矣余竊謂觀風者當以異等薦不當混諸時吏之列豈諛語哉

趙平原君廟記

郭崇嗣

肥壤在戰國時本趙邯鄲地也城南八里厥地隆亢有平原君墓巍然高數丈望之若山然世代既遠有愚民及野僧乃于墓顛建娘娘香火以祈福利殊爲無謂墓之切東地勢稍坦有古廟三間中塑神像蓋卽平原君廟碑碣不存周圍有墓田若干畝歲久蚕食止餘十畝二分正德丙寅廟記不支西屯庄民鄭諒重建垂五十年廟貌復弛索家寨耆民蔡景暨諒子珣思紹前功復大加修飾大殿寢殿拜廳門垣皆規

度殿整金碧交映大踰昔制肇工于嘉靖乙丑仲春凡九越
月而工畢乃懇予爲記予覽一統志及舊郡志皆不載趙王
廟及平原墓惟邑志載趙王廟在城南八里而不言爲趙何
王復徧詢鄉老年長者皆訛云趙簡王廟予疑未的然別無
考據姑取簡子行寔書石爲記時嘉靖丙辰歲也隆慶戊辰
有大風南來盤旋碑下碑忽仆碎庚午冬蔡進忠等懼泯其
績復置石樹碑來請予記且云前碑仆矣予聞而訝曰予曩
疑非簡子廟豈其真非而神不欲耶乃取文獻通考等書徧
閱之其洺州輿地考云肥鄉有平原君墓又考肥鄉八景趙
陵春雪注云平原君塚高聳於田墓陰積雪春暮方融

卽此是也嗚呼平原君墓古跡之鉅者也兵火之後幾不復
識豈非以文獻之無徵乎且我明修一統志皆明公秉筆于
肥鄉祠墓中亦失考輿地遺而不載他何怪耶按遷史平原
君名勝趙諸公子中之最賢者功在社稷彪炳千古考諸傳
記赫赫若前日事沒而建廟一方享祀不絕固祭典之所當
隆也乃今千載之後守塚斷絕儀物蕭條獨幸遺廟僅存使
非鄭諒蔡景等之屢加修葺亦將變爲瓦礫之場而與荒烟
野草俱盡矣諒等之功烏可泯耶或曰平原君墓予嘗修邑
志載之而墓顛娘娘廟則何以哉予曰有賢有司出必撤而
除之或移建別所仍墓前樹石大書曰趙公子平原君之墓

觀音庵記

郭崇嗣

吾肥之東三十里有鄉曰倪兒庄庄之東北隅有觀音庵肇
建不知何時俗稱倪兒庄寺寺地十餘畝蓋諸僧耕種以供
香火者嘉靖初兵憲劉公行支折毀淫祠凡境內寺觀之類
其文伐殆盡茲庵亦在毀中時先祖侍御受庵公鄉居嘗憇是
庵有僧王姓者法名常泰弟子慧杲具有戒行頗涉禪理先
公可其爲人且憫諸僧之頓失所依也乃用價贖之爲業給
帖爲照寺由是獲存其後數年有遊僧號圓寶者不知何許
人過是庵謂衆僧曰茲若建殿則衆有瞻依吾爲若化緣可
乎衆許諾未幾群村畢集建大殿三間殿成遊僧不知所往

適有傭人于堂者其苦積貲三十金觀殿成慨然盡捐
所積塑大佛一尊鄉隣斬從周趙助輩又於兩傍建小殿二
所塑伽藍祖師其歲月先後皆漫無所紀隆慶二年鄉民張
友者病目盲發願募緣爲寺樹碑雙目忽明至是碑完住持
性如常泰之徒孫也托鄉親趙助求予文爲記予時方之河
南僉憲未暇文也三年予以給假家居助來復申前請且云
先公嘗欲作記貽寺以碑石未具而止願爲文以續先志予
聞之喟然嘆曰寺之興廢其僧之所爲乎昔者達磨面壁而
少林顯忍師授法而黃梅彰慧能闡教而曹溪著皆地因人
重者也茲寺之初發屋頽垣壞一庵而已向非先公以常

泰之故贖而存之則淪爲民田鞠爲茂草久矣迺今殿宇輝煌佛像藻麗門垣翼翼鐘鼓鏘鏘巍然爲肥東名利是可忘所自哉噫性如性朗輩若能繹思常泰之賢深明定慧之旨不愧衣鉢之傳則茲庵之勝將與少林同芳黃梅同秀曹溪接武矣最之哉最之哉

修闕帝廟記

明張懋忠

僕常過解梁之墟而撫公遺跡也公龍逢後裔世居中條北麓少負奇氣擅武勇儀度異於恒衆喜誦法左氏春秋閭閻有狂悖豪右徂擊殺之避地走涿鹿友善張翼德是時炎祚乾綱解紐日尋兵革昭烈以中山之胄懷大有爲之志突起

末葉雅識公草莽間公以故共翼德同締手足盟於樓桑下
傾身輔翊歷鋒鏑處利鈍百折不撓卒能奉昭烈定蜀西蜀
衍既墜之脉策一代之勲血食千百世之下原其始未公蓋
負五絕云興平建安羣盜並熾割據土宇中原逐鹿未判誰
手功名之士惟力是附棄國難而折節孫曹比比也公鑒天
命未改景從孤子正系窘厄萬狀隨遇而安人所易惑公獨
不搖公之明下邳敗績昭烈不絕如綫公落落無所歸誰不
可委主母而死入許昌曹袁以侯子女金帛踵相接寔欲以
利結公公士苴之達曙之燭與日月爭明公之節致討黃巾
解圍白馬曹南郡而祝魂禁焚水而歸命投之所向竹破土

崩公之威最譎莫曹若最殘忍亦莫曹若文舉德祖敝屣委
棄握公掌上勢可刀俎加也乃凜凜 公真慄如對越神祇
及其逸入袁軍不行遐絕嘉嘆不置公之誠荆襄重地肩臂
益州趙馬鉅才靡可輕措公處之晏然土瘠歲沴東比燧燧
帖如公之才是五者生民之絕德抱其一足樹不朽矧身備
衆善心貫金石功載旂常名垂青史豈與輔世勲伐可同日
語哉廟貌竣事二三黃髮謀勒貞珉而命僕操觚粗陳大畧
如左至若肇建伊始僕曾祖群丞及大父司馬業畢其說於
前不敢贅

李文靖公祠記

清東海張翼

肥邑之西有故宋相國文靖李公寢廟焉距數十武傳爲公
隧道不封不樹也其祠則遺礎所存頽坦斷瓦而已余下車
時輒慨然思有以克新之而力未克復竊自余平時讀古先
正傳必謹識其里居俎豆之處以爲後日游歷所至或得一
憑吊焉豈今幸服官而終忍湮沒置之耶稽公相業著在簡
策者甚悉且不朽余又何所容揚厲爲獨是椽桷數楹廢興
明代者凡幾隆萬間闕葺繕其碑記人士能藏之然計其
時率因仍敝宇益以蔭塗且席全盛物力充拓故咄嗟易辦
自鼎革來瘡痍未復吏多救過不給又漳水衝突無恆時以
故栢斲松櫟鞠爲茂草必有以大創之益艱且鉅自丙申歷

三載已亥余約俸錢所入計百金有奇悉出之爲工築費而
民之踴躍用命者千百人採木者於原負畚者於道巧者職
聖斷者引繩始於秋抄越月而歸然告成瞻拜之下爰進諸
衿庶而語之曰爾多士其亦悉予表章之苦志乎夫公以深
沉正大之氣光輔宋室其行事卽難枚舉而觀其先幾慮患
之志約以一言亦曰格君心之非而已夫源潔則流自清也
本端則末自齊也今 國家際永清之烈以創始而裕守成
乃水旱盜賊之灾亦所在時有令得如我公者起而凝丞左
右吾知進外寧內懼之說建久安長治之規當不第坐鎮雅
俗已者則我躬之所自厲與多士之所訓行舍公又奚式哉

士居恆預養公輔之器必儀型古先一人爲之的而期以赴之誠心公之心則晤之於詩與書見之於羹與牆皆是也奚待入廟始肅觀瞻而或靡所仰止則無以激發其志氣而交相勸幸庇公宇下因與考德問業其中儼如公之日監在茲陟庭而上下焉其不爭自濯磨期勿愧古大臣風烈者無有然則表章之役雖欲已之烏得而已之若夫時風雨以護其基勤蓄洩以厚其址則卽以俟後之繼起而同志者

函樓記

賀應旌

己丑冬十一月函樓成客有揖主人而問曰樓以函名固善其於主斯樓者奚恥焉爾不見夫江河之水乎其在江河也

洵焉洞焉無所不有及分流于支別之外而斯須不能容矣不能容而強以容名惡在其爲江河之實也語未竟主人急起扱杖而再拜曰斯言過吾師丈人遠矣性浮而動靜可以治器淺而褊裕可以治質隘而澆德可以治才庸而疎數可以治主人四病業兼有之急則佩韋緩則佩弦以當警觸不亦善乎客退而語人曰吾與主人論樓而得論學法匪徒竊其似而務覈其實持已持人處事其一以貫之矣

遷接引佛記

邑人郭鳳翔

從來國運之盛衰闔乎人材之消長其消也必有以厄塞之其長也必有以振作之事若偶然數歸前定旁觀者之計筭

與夫先事之燭照總無所用其力焉爾我肥鄉素推文獻之邦明嘉隆間人文稱極盛一時科第蟬聯冠蓋接踵洎萬歷初載忽有李朝綱者不知其爲何許人乃捨身出募於燕趙豫晉之間得銅數十萬觔欲建接引佛於邑之女殊寺畚揷已具而棟宇未啟爾時邑侯善堪輿聞其事驚訝良久已而曰果行則邑之僧肥民瘦矣卽下令寢格不行佛暴風露泥塗中者三年及邑侯遷秩佐貳代庖朝綱尋出夤緣舉之佛像連座幾三丈許而殿宇蓋出雲表東視文宣王廟高倍數尺嗣是肥邑諸巨室乃漸衰微而每科登春秋榜者寥如晨星可指此豈特僧之肥民之瘦已哉議者輒歸咎朝綱妄建

接引之故民則無知士則攘臂而當事者以傳舍因循置若罔聞迄今六十餘年其議雖存其事未舉臨舞雩邑侯蒞任詢其由毅然曰是誠在我乃托余相地於邑之北郭曰井堂寺者其地坦平夷曠愜稱神居爰卜吉於余歲壬寅之春二月初旬鳩集工匠移佛此地仍繕葺寶殿以覆之不匝月工告竣侯曰佛得其所矣不復受人擗掄而儒風無阻從此彈冠鵲起所闢於邑之風化匪渺是不可以無記余因授簡濡筆而嘆曰肥六十餘年之厄運豈以一接引之爲也而接引適當其會人遂嘖有煩言向使接引不建湮塞如故人又將誰咎耶大抵天地間一數而已矣數則難逃朝綱之建之者

數也邑侯之徙之者數也卽揀引之爲所建爲所徙者亦爲數所乘除也不然接引則菩薩之別號慈悲六道普濟群生憫士子之困窮悵文風之厄塞寧漠然不動于心而竟與文宣大聖人爭雄長于六十餘年則何爲也哉明歲屬當大比戶鳴一鎗人標一幟有登孤先登者有斬將擒王者科第蟬聯冠蓋接踵雖沙門淡漠未必皆佛之靈應而人則因此鼓舞亦未必非佛之激發不可盡曰無功也至接引佛出處載在內典余不必贅姑志遷佛事實垂諸石以存邑侯善政之一端云

一件爲飭備事遵奉 府檄會集閩邑紳士公議修復舊城
於雍正九年二月初四日據紳士張瑞生等呈稱肥邑城
池自康熙乙巳湮沒至今六十餘年縣治東偏輪將不便
閩邑紳士百姓情願量力捐輸恢復舊城生等承任首事
分班料理事在寔行並不推諉等情據此將紳士各姓名
造冊申報府憲 一件爲隨衆願捐修復事九年二月十

一日據鄉民王國治等呈前事稱紳衿倡議捐資修復

生

等亦願隨衆捐輸不拘多寡幫修四門等情據此將鄉民
各姓名造冊申報 府憲 一件爲舊城之修整有緒
文廟之遷復宜圖懇賜詳請憲示以便次第舉行事九年

九月初七日准儒學牒呈前事稱本月初六日據闔邑紳士張瑞生等呈稱舊城坍塌公懇興復卽蒙王老父臺檢閱原案首捐俸銀一百兩以爲通邑之倡設簿勸捐擇人董事自春徂秋四門樓堞以及官署堂舍衙房庫藏牢獄等項粗已完具惟學宮一項尙缺而未脩念舊店營之學宮原係闔邑捐建生等情願各捐車輛移過舊城重爲修葺但事關大典生等未敢擅便懇請牒縣轉請詳 憲批示遵行等情由學牒呈前來准此據情詳請 各憲批示遵行嗣蒙 本府楊批仰候查卷轉請批行飭遵繳蒙

布政司王

批

候轉詳繳蒙

刑部尙書署直督劉

批該縣城垣等項既經建設舊城則文廟自應敬謹遷

移以便就近瞻禮肄業繳一件爲謹報遷復舊城衙署

日期事竊照肥鄉縣舊城自康熙四年漳水滄沒暫移邑

之東偏居住迄今將七十年矣閩邑紳士人民以舊店營

僻處東隅西南北三鄉因公赴縣大有不便僉稱情願量

力捐輸共勸盛舉卑職隨將任事衿民冊報本府又倡捐

養廉銀百金四路衿民莫不踴躍樂輸凡城門衙署庫藏

牢獄學宅捕舍挨次修舉週圍土垣增築高厚于雍正九

年十月下旬次第告竣茲據閩邑士民公請遷署前來卑

職謹擇于十一月十五日自舊店營遷入舊城之新署所

有捕官并庫藏軍獄巡馬夫等項一因總領合將
日期報明通報督巡二院憲並藩臬道三憲以及
本府 捕府 分府 河廳四憲 一件爲舊城之修整
有緒等事九年十二月十三日奉 本府信牒蒙 布
政司王憲牌蒙 刑部尚書署理總督劉 批前事仰
縣官吏照牌事理即將該縣官署從前暫居舊店營係
題明奉

旨欽遵之案且相沿六十餘年一旦改歸果否便民其修設各
項需費若干有無派累逐一確查明白詳覆核轉等因到
縣蒙此竊查肥鄉縣舊城自康熙四年漳冰沖決暫移廩

鄉舊店營傲民房以爲衙舍曾經詳題議覆俟水涸之

日地方官設法修理奉

旨依議欽遵在案六十年來道里不均輸將不便且倉庫牢獄

牆卑室淺罕所防衛胥吏辦事俱係賃房散居因循苟安

勢非得已嗣因漳水久涸肥之紳士日謀修復五十六七

年間呈縣呈府呈道屢經批行飭查案卷疊積前令王能

任曾經設法修築土城基址又建縣署前堂後樓十餘間

不及繼而中止雍正八年九月內卑職到任查閱卷宗訪

問紳耆始知從前端緒迨九年二月上旬會同全城官傳

集闔邑紳士耆民公議僉稱舊城係四鄉適中之地士民

考課輸賦至爲便週急宜修復以慰輿情于是設簿勸捐

卑職

倡捐養廉銀一百兩擇士民之品行而殷寔者分掌

其事木石灰瓦時價平買匠夫工役俱給僱直入則有紳
耆之收管出則有匠工之領狀不假胥吏不用差役自三

月初旬興修至十月初冬凡城門衙署學宅捕舍庫藏監

獄各工粗完週圍城垣仍如前任王令照里分工各鄉鄉

約自督自築

卑職

不時巡視獎勸歷五日而更休越二十

日而竣事

卑職

初捐百金後又緒捐百金通計所費共二

千六百八十兩零寔由士民踴躍樂輸並無絲毫派累及

至十一月各工粗完旋據士民赴縣敦請愈稱出費助力

人等群望早遷以慰所願倘不亟遷則失望生悔等語

卑

職以其情詞激切遂于十一月十五日遷訖業經通報在

案應否咨 題伏候 憲裁核轉等由詳覆嗣蒙 本府

楊 批仰候據轉繳 布政司王 批仰候核轉繳 刑

部尙書署直督劉 批仰將該縣從前舊城衝決暫移舊

店營之詳 題部議俟水涸之日地方官設法修復各原

案逐細查明裝叙妥確詳請核奪 題達繳等因蒙此隨

經詳覆 本府據轉在案 一件爲遷復舊城方新大典

功成有待謹採衆議請將隙地餘基詳明辦公事查肥鄉

修復舊城已經申報遷署在案又學宮 文廟亦經據呈

詳請 憲批准遷修蓋在案目今聖殿三間已成教職署
舍亦脩惟是兩廡樞星門明倫堂 崇聖祠等項未克興
修 闕聖載在祀典而廟像未建省牲無所凡此二端最
闕大典再四門之外不可無橋梁以通水道以利行人查
有縣署之前學宮之後在街兩旁餘基并無主隙地人人
爭欲得此以爲貿易之所但官旣不以遍給民又不得以
擅占恐將來不無衙役市棍心生覬覦以起訟端 卑職管
見如有情願捐資辦料分修學宮橋梁等項工程之人應
酌發印照分給管業仍丈明地基數目按照下則陞科辦
糧以示鼓勵以杜爭端其餘工料或有不敷 卑職再爲

捐添補紳民議僉同可否久從伏候 憲臺核奪通詳

督憲 藩憲嗣蒙 本府正堂楊 批既經通詳仰候

督 藩二憲批示繳 布政司王 批仰廣平府作速確

議詳覆繳 刑部尙書署直督劉 批仰布政司查議詳

奪繳等因蒙此隨經丈明各隙地基址畝數并照依行差

地陸種辦糧定議詳覆蒙 署本府宋 據轉詳覆蒙

布政司王 據府詳加着轉詳奉 刑部尙書署直督劉

批如詳飭遵繳 一件爲報明事九年十二月十九日奉

本府正堂楊 信票准直隸副總兵李 移會設法料理

營房務令原防弁兵一件移駐巡防共保無虞等因查營

汎兵丁原爲防守城池倉庫護解錢糧重犯而設官署既
經遷居自應令兵丁一併移防但營房一項如欲詳請動
帑興修則估計 題達議覆施行須時必久且城垣衙署
旣屬捐蓋則營房亦不便再行 題請自應設法料理肥
邑防兵八名須蓋房十五間始敷居住隨以八九兩年開
除未盡連正帶耗共附餘銀六十兩零詳請爲蓋造營房
工料之費其餘不敷再行倡捐設法料理嗣奉 直督劉
批此項附餘錢糧前於審 題草令陳紹芳濫徵案内敘
明應行查明開除之項則徵存銀兩仍應起解報 部未
便率請動用仰 布政司飭遵繳緣未批准隨經多方設

措銀七十六兩併墊賠養廉銀七十四兩修理營房十五間圍牆十五丈二門大門照壁俱脩于雍正十年四月十五日竣工通報在案至 文廟 關廟于奉 憲 批允認地辦糧之 據士民報捐脩料請撥地基者源源而至遂建大成殿五間頗稱宏敞壯麗九年冬移建殿宇三間改爲崇聖祠殿之東西建兩廡各五間前造櫺星門三楹壯似牌樓門內開鑿泮池池後建戟門三楹街之東西豎牌坊貳座周圍牆壁共築一百十餘丈廟西造明倫堂三間另爲一院花牆月臺俱脩規模濶大形勢整肅不似從前舊店營之卑陋矣 關廟大殿三間捲廊三間內塑

聖像旁列侍像後建追封三代殿宇三間側造僧房各二
間前爲戲樓甬道頭門二門俱全圍牆五十餘丈規制宏
麗廟貌維新俱于壬子七月竣工報明在案 按修復舊

城工程浩大從前歷任自康熙四十四年起屢據士民具
呈詳請案卷疊積究未興工迨前令王公于五十八年始
創有縣署之前堂後樓數楹築有土城基址數版因不能
繼而中止庚戌歲秒余蒞任未幾查閱從前卷宗思復城
之舉未可造次因于辛亥仲春集紳衿公議僉同力圖恢
復各願捐金任事士民具呈到案余卽將各士民願捐姓
名開冊報 府然尙意董事者未能同心樂捐者限于物

力未敢遷料其必成但事宜勇往迅速以鼓勵其心志于
是首捐養廉爲倡設簿勸捐擇季春之吉而興工焉亦不
拘泥于詳報之虛文自春徂秋修整規模粗具紳士見修
復有緒益加踴躍因有請遷 文廟之呈是不得不爲據
詳請示及一陽之月城工衙署庫獄等項俱已告成士民
環請遷署以慰輿望因爲申報遷署日期時唯 文廟修
理未竟 闕廟及橋梁急宜修建于壬子春初請以署前
街旁隙地給急公捐修學宮橋梁工程之人業蒙允詳興
工修建俱告落成又營房及汛兵防守之居勸捐未能興
修無項因請動支徵存附餘銀兩未蒙批准亦已勉力捐

修竣事各詳案 憲批皆修復舊城之始未事實亦余百

計設法而成雖不敢居功然案

卷應誌以
皆考云

王公建申德政記

邑人

宋錦

公姓王氏名建申字懋庵錦縣人雍正癸卯科進士授肥鄉令持體精明任事慷慨不畏權勢不容干謁與人坦率而情真蒞任之始慨然捐俸修復舊城辛亥之春奉建倉廩兼立四門次修衙署以及行臺營舍翕然就理而遷移文廟修築垣塹越八月而工竣一陽之望鵬徙而居紳民莫不感悅壬子續建大成殿兩廡靈星門戟門明倫堂關

帝廟祀刊祀典雍正庚子歲而也

人慶賀餽遺閏五月二十七日攝郡城同知篆十屬盥典
各以儀禮晉公檄却不受隨諭送肥鄉學工辨班公事闔
屬紳士儀物悉還之所以公之壽辰鮮有聞者錢糧火耗
以加一王爲額過此卽標長封實貼大門勅花戶速爲領
去莅任甫年餘修城捐輸約三百金養廉俸薪傾囊無所
惜日用蔬菜米布俱詣市交易價值無分官民受詞不厭
煩瑣隨到隨剖決案無遺牘用刑惟巨惡大奸不少寬貸
餘則小板量責令其知警民皆服其居上之寬他如嚴夜
警以彌盜賊禁賭博以懲游蕩修縣志以記縣制善政更
難更僕數今略記其大端云

重修文廟學宮記

嘉慶二十五年

國家崇儒重道建文廟以祀

聖賢立學宮而興教化故祭以上丁執事者共嚴對越限爲月

課入泮者均受裁成典至重也肥邑自康熙三年漳水滄

城文廟與學宮俱廢雍正三年邑侯王公始創其基乾隆

三十七年邑侯戴公大啟其宇迄今計之已歷四十餘年

矣廟貌雖存不免風雨之剝落講堂猶在難堪瓦礫之涓

殘

生

等入廟而相儀徒深肅若登堂而請業何勝慨然迫

我

任

徐二夫子司鏗於茲均有重修之願而苦於獨力之

難成爰是謀之同人共襄勝舉奈規模已就丹雘未施財

力遂已告匱幸蒙我 邑侯姜老父師慨然以告成爲已
任獎勵士庶完此鉅工復稽禮文添造祭器舉行書院定
爲課程遂使里豆庠邊用展椒漿之獻成人小子咸蒙作
養之休士習與民風日臻乎上理皆我 姜父師與
二夫子之惠也謹爲記

重修寶文正公祠堂記

同治元年

教諭趙文濂

寶文正公元之名臣元之名儒而肥鄉其故里也閒嘗博
稽史冊高其風懷其地想見其爲人而涑水肥鄉相距遼
遠興思親炙苦於無由咸豐辛酉承乏是邑九月抵任急
詢公之里居始知公係縣屬之城西村人有祠有墓有護

墳地三十二畝以供香火歸儒學經管每年春秋致祭儒
官行禮由來久矣同治初元二月上戊躬往致祭見祠堂
牆垣傾側門戶摧殘神牌不知失落何處祠外樹皮剝落
枝幹枯焦墓亦邱隴僅存漸就傾圮急詢其故始知去歲
三遭兵火十一月賊扎營翟固等村地方逼近最當兵衝
蹂躪之餘頽廢至於此極瀛心傷目擊有志重修次日赴
府送場未遑修舉四月考畢與副齋劉光陞商議重修各
捐廉俸舍舊圖新而城西苦無讀書人難以承辦因翟固
距此切近廩生郭慶雲武生尙致俱結實可靠因以監修
之責囑二人廢者修之墜者舉之塗葺丹雘晏然一新爰

擇良辰恭設神牌虔誠致祭而重修之志於是始酬自金
元以來浮屠老子之宮遠近相望而名臣名儒祠墓任其
荒廢無人經理其間此亦備官者之責也因誌重修巔末
如左而郭生尙生其勤勞亦不可沒云

肥鄉縣創建昭忠祠記

同治二年

教諭趙文瀛

國家褒揚忠烈典禮攸隆凡紳民殉難及陣亡者崇祀昭忠
祠所以厲臣節振民風也肥鄉時當

聖世二百餘年兵革不興紳民鮮有兵死者故昭忠祠久未建

立咸豐十一年二月山東教匪及土捻各匪同時蠢動連
陷曲周清河廣平三縣肥鄉正當兵衝楊樹屏明府修城

垣除戎器誓以死守四月十三日賊據縣境胡盧營四出
焚掠城內遷徙一空十九日賊鋒愈逼樹屏激厲人心衆
志咸奮鄉團俱告奮勇獄囚亦願効死行間二十日樹屏
帶練勇劉光陞學博帶鄉團赴胡盧營進剿前鋒甫接軍
中有怯懦者策馬先逃後隊驚潰前隊陷入圍中附生呂
諧宮挺身出戰中傷陣亡屍身未獲樹屏光陞奮勇冲殺
增生張夢星獨力斷後擊退賊衆收隊而返查檢練勇鄉
團獄囚陣亡七十三人樹屏據寔轉詳懇請

賜卹久未入奏同治元年清明節樹屏卽闕帝廟後殿廂房

設立義冢

同治元年清明節樹屏卽闕帝廟後殿廂房
設立義冢

唏噓泣下哀不自勝蓋憐其志之堅而命之苦也十月山
東降衆張錫珠等五十三人倡亂癘與樹屏光陞操演練
勇整飭鄉團修造戈矛教習隊伍以資防剿十一月二十
七日賊抵館陶之房爾寨楊竹坡外委率練勇三百人赴
東章堡會同東路各團防堵二十八日賊抵廣平之寺郎
固距縣東南界僅四五里瀛與樹屏秘議調元固一團赴
河頭堡迎頭堵截調西南四團駐元固以爲聲援並調各
團相機策應知會竹坡回兵以爲各團救援二十九日清
辰西南四團未到賊已分路攻撲元固一團首先接戰鄉
團長搶多而火器少又兼步不敵馬難過奔衝團長團丁

先後潰散而河頭堡油胡寨陣亡生監尤多屯庄營團總武生程榮凱率四村團丁與賊接戰死傷相繼視死如歸與各團長受禍最慘幸竹坡敗賊西賢店賊鋒大挫次日遁出境外查點各團陣亡文武生員十三人監生四人團丁一百三十餘人樹屏據寔轉詳懇請

賜卹亦未入奏二年三月樹屏調赴軍營因義勇祠在關帝廟

後殿廂房規制不稱函囑張夢星等在關帝廟大門內東偏創建祠宇三楹中設神臺安置陣亡團長東西兩偏各設神臺安置陣亡團丁以示區別團長各設神牌書寫銜

名團丁立一長牌總書姓名以歸簡易祠既成瀟西商討

屏撤去義勇祠呂諧宮程榮凱各團長崇祀中間胡盧營陣亡團丁耐祀東偏各團陣亡團丁耐祀西偏以歸畫一而顏其祠曰昭忠從

國家定制也

瀛

於胡盧營之役尙未抵任而呂諧宮生員也歲

試開除本係陣亡難言病故謹會同光陸將呂諧宮陣亡情節申明學憲並託金鏡軒太守極力懇求楊稼生學使移咨王蔭堂觀察轉詳文星巖制軍奏請

賜卹然僅呂諧宮一人不在學校者本學例不準報也程榮凱等十三人陣亡情節亦申明學憲蒙批俟詳明督憲會咨再行具題則

賜卹不過少遲時日耳預爲崇祀恭候

命下亦仰體

國家褒揚忠烈之雅意云爾則樹屏之屬臣節而振民風者所

係豈淺鮮哉是爲記

重修敬一亭記

同治二年

教諭趙文濂

敬一亭者藏書籍之所也各縣皆有之而肥鄉老屋三間漸就傾圮欲重修之軍書旁午不暇及也一日練局紳士張廷昭張夢星王琴堂李占奎告濂曰自軍興以來設立摠團練局飭某等專司其事而假館以居迄無定所由來久矣方今兵亂孔棘鄉民避難入城者紛紛房主屢請遷移以便栖止

而城內房屋所在皆滿寔在無地自容查敬一亭係公所因其舊址舍舊團新庶幾一勞永逸敢以請濂應之曰昔魯僖公芹藻鸞旗開設學校而在泮獻囚在泮獻馘在泮獻功皆受成于學非以文事武備一以貫之乎况庠者養也校者教也序者射也謹庠序之教修其孝弟忠信入以事其父兄出而事其長上可使制梃以撻堅甲利兵則有勇進以知方矣古人教民所以涵育之而董陶之者無異術卽無異地也今敬一亭殘破極矣蒙諸君雅意得復舊觀濂之願也敢不惟命是聽議既定鳩工庇村擇日興工中因舊基建正房三間仍顏之曰敬一亭以爲諸紳民支發會計及宴息之所右建耳

房兩間以藏軍器左建耳房兩間以作庖厨修築牆垣刪除
榛莽院宇恢濶老樹輪囷濃陰四合戶牖間皆作綠色較向
之荒涼寂寞迥不侔矣亭旣成擇吉移居而團練局遂有定
所自時厥後太平無事則夏絃春誦書籍發爲文章軍務控
忽則敵愾同仇禮義以爲干櫓顯謨承烈文武兼資是合天
祿閎籌邊樓而一之矣然後知張廷昭張夢星王琴堂李占
魁之爲計深且遠也後之官斯地者甚勿謂寓人我室久假
不歸而戎馬塵氣非禮樂詩書所可滌也蓋敬一亭已傾圯
借團練局之力而興復之非團練局無定所假敬一亭之地
而久據之也是爲序

肥鄉縣重修文廟學宮及文昌閣記

趙文瀛

咸豐丁巳劉曉山劉光陞兩廣文因文廟殘破勸捐重修
州同呂文翰貢生趙綱增生張夢星監工甫修大成殿及東
廡而蝗大至所過之地禾稼一空因而止工餘錢三十九千
五百文飭趙綱張夢星分存俟年豐再爲修舉而旱蝗交迫
兵亂頻仍因循未果辛酉二月曉山卒瀛於九月抵任時兵
火正急光陞又調赴懷慶軍營與楊樹屏明府集衆守城日
不暇及同治壬戌十月迄癸亥九月兵禍愈急與樹屏光陞
修城濬濠造軍器練鄉兵防剿兼施幸而無事十月兵亂漸
平光陞以終養告歸十一月樹屏升廣平府知府甲子正月

赴任臨行囑濂曰去歲修城門弔橋弔取四鄉廟樹以濟要
工其餘剩木植交紳士變價充公除修昭忠祠敬一亭及義
學並立陣亡殉難紳民婦女題名碑外錢如有餘卽將文廟
學宮及文昌閣量加補修二月上旬與紳士集議時趙綱已
先卒呂文翰遠在鄉卽派張夢星會同王琴堂張廷昭李占
魁監修崇聖祠前後簷瓦俱脫落簷檁斷折另換連簷插飛
及簷檁一補修上蓋文廟引路西碑樓殿製重加圻修引路
東碑樓上蓋殘破重加修整二門簷瓦脫落簷檁斷折另換
連簷插飛及簷檁一補修上蓋靈星門木架欹斜瓦俱脫落
重加圻修東轅門補修上蓋西轅門久經傾圮重加興修照

壁東圍牆臆裂西轅門北牆亦傾欹重加圻修忠義節孝祠
補修上蓋門多殘缺一律補修文昌閣補修上蓋二門殘缺
太甚重加圻修大門後殿圍牆隨處粘補明倫堂前後簷瓦
俱脫落簷椽壓彎後簷另換連簷前簷換椽三修補上蓋東
齋房傾圯無存重加興修西齋房補修上蓋並換簷椽一二
門前後簷瓦脫落另換連簷補修上蓋並換明柱二大門瓦
俱殘缺西牆閃裂重加圻修照壁略加補修二門東腰牆一
道傾圯已久重加修築而學官衙署亦賴諸君之力量加粘
補以便栖止大工于是乎告成夫文廟學宮一邑人文聚會
之處也肥鄉自兵亂以來蕩析離居未遑誦讀樹屏興復書

院重修義學以培士氣而振文風升任後猶以文廟學宮諄諄相囑則偃武修文造福于紳民者豈有盡哉官樹變價充云及趙綱張夢星所存餘錢尙不敷用又動樹屏棉花餘息一百八十七千零以濟要須則樹屏倡議于前捐資于後所以惓惓於肥鄉者誠有加無已矣是役也王琴堂張廷昭李占魁監修勤苦不遺餘力而始能經手者則張夢星也惜光陰以養親去未能觀厥成耳

藝文

誌

永年縣丞郭謙墓誌

明吳郡王 鏊

公長孫吳江尹郅自任奔喪走使京師乞銘郭故家河南鹿
邑公祖諱仁美洪武初以歸附民至肥鄉父諱晟龍江衛經
歷以清謹聞配周氏寔生公公諱謙字致恭少入郡庠爲弟
子員以科目致用時妖人唐賽兒捕久不獲會其黨千餘人
自新德至肥鄉伏旁舍將亂人患之弗敢言公入白其狀于
府守懼弗出同知獨奇公卽委公捕之公曰是當以計取不
然且逸會暮夜先以衣物散民家垣外佯言中有盜入跡至

賊所賊不晤其爲已也遂盡獲府因以公部諸賊赴闕正統
初公年二十二英宗御批授本縣主簿賜衣二襲寶鏹二千
貫馳驛之任公居官多方畧旁縣有事久不決多被檄往無
不立辯盜賊朝發暮獲人號爲神明境中帖然九年赴吏部
于例當進二級公以親老乞近地未任以憂去已巳之變大
理卿王偉以巡撫駐境土聞公名召與語大悅薦公于朝尋
情授永年縣丞時邊報日至公聞命墨衰以往不避艱險防
禦撫綏民用安堵時有以修城繕兵爲言者公曰止今民且
奔竄又驅之役是逐之也其誰與守且賊必不至已而果然
景泰六年致仕以子忠貴封奉直大夫戶部江西司員外郎

處州知府郭忠墓誌銘

長沙李東陽

予聞澗藩張布政稱良有司得知處州府郭君廷臣處人相與建生祠奉之未幾君卒其子鄉貢進士郭方以母憂居肥鄉馳省君至杭得訃奔至處返君喪道鎮江奉楊按察應寧狀上京師請予銘蓋其母之葬予寔銘之矣初君舉成化己丑進士官戶部爲主事督收京儲會計精當尋督天津諸衛及汧石諸場芻賦宿弊盡空屬吏以金餽郤弗納遷員外郎督儲臨清見伐桑棗貨食者畀之米且諭之曰植物不易貨且盡當復何貨民感悟遂不復伐會議開邊欲君督餉解不獲比出境不遇賊而還進郎中除處州寺久闕倅二更署吏

緣爲姦君至嚴防禁籍記條教事無留案尤精判決人不致欺嘗有群盜久弗獲君憂而禱之是夜夢衛廩穀盜因廉得米廣者爲盜窟併獲賊證衆以爲神愛民節用禁胥吏勿下鄉并還逋民萬餘口復舊業歲旱禱雨雨輒應有蟲傷禾稼爲文祭之三日而死有瑞竹瑞蓮嘉禾諸物或以頌君君辭焉獨嚴馭下貪官黠吏皆斂不敢肆惠歸于民民是以思之處人輯所立條教曰爲政紀綱曰括蒼規約以傳其所自述有詩文若干卷銘曰世有毀譽或非厥情面背則殊矧惟死生浙有郡侯郭姓忠名蒞郡六年而棄其氓氓思我侯侯我父兄劬孰我佚擾孰我寧泣以送之有淚吞聲侯也何知我

情是嬰侯生有祠匪悅與營曷以驗之于侯之行有考績者
視我茲銘

貴州道御史蔣勛墓誌銘

廣陽車 璽

公諱勛字世功別號葵軒祖祥任南京虎賁衛經歷父鳳嘗
爲臨淄令母顏氏生三子公其季也幼秀朗動止如老成人
誦書若宿習居家克篤孝友與人交敦尙信義隨侍父于臨
淄時彭澤先生者爲司訓以春秋鳴公師事之輒得其大旨
領成化丁酉鄉薦辛丑登王華榜進士授河南濟源縣知縣
民俗獷復喜爭公至通經賦廉昧習擊豪右以雋果集事甲
辰歲歉撫養瘡痍寬減逋負民賴全活縣境臨山西間有逃

竄山谷黨助蔓寇者公多方捕獲用以寧摺貴州道御史
敢言不依阿洪憲奸回博焉宏治改元往給賞紫荆等關軍
士已酉查達東糧儲庚戌巡視居庸等關躬歷險阻不憚勞
勩完城堡肅部伍權貴私侵軍士者聞之潛遣還辛亥出按
山西壬子丁父憂甲寅服闋改山東道陞河南按察司僉事
分巡河北河南道往蒞洛西至陝州疾作輿歸寮友相率入
闕公泣曰君恩未報母年垂老今不可起矣奈何諸公相與
渾淚而訣銘曰英英乎其志之銳也井井乎其邑之計也峩
峩乎其豕之觸也肅肅乎其刑之錄也懇懇乎其勞之勩也
嗟嗟乎其蘊之闕也

河南道御史郭郭墓誌銘

淮海蔡昂

公諱郭字于蕃姓郭氏廣平肥鄉人公生有聰明穎悟書一過目輒能誦至于再三則終身不忘十歲從知府公于京師時州守贈少保象峯夏公雖未第已有盛名知府公延以教公一見喜曰此奇童也成化庚子舉于順天後又游遂菴楊公之門同游多名士而太原喬公宇北地李君夢陽爲冠人推君爲喬李之流亞而楊公亦謂門人曰郭生固奇士會知府公與太宜人相繼卽世公以祿不逮養無進取意所親或規之曰以子之才終不爲世用乎公瞿然起謝宏治九年與夏公同舉進士是年除知吳江縣踰年丁大父憂十四年服

闕改除英山十五年以才可治兼調清河居兩月被召除南
京河南道監察御史初得吳江大父尙在跽請教曰爲政有
體獨不聞慈愛爲縣令體乎公性素嚴明用是政主平易而
以嚴濟之作興教化獎予人物解庾橋道無弗飭者沈生漢
有異才年少名未起公見其文奇之爲之授室而厚其資給
漢後果登第爲名給諫有費全者武斷鄉曲且持官府短長
公召而諭以禍福薄責釋之後不改寘于法英山負險難治
乃用其所嘗效者蒞之民以協服又奏旌孝子段宏仁以勵
俗在南臺力任激揚不畏強禦巡督江北倉儲搜剔吏蠹疏
滌民瘼諸路賴之獨其嫉惡大明雖以此得名亦竟以此報

禍御史某按南畿登覽廢政公和其詩有箴切語某銜之滿
歸言于權要遂效公致仕時正德三年也公雖被抑耿耿自
信閑居三十年不柱尺寸視昔從游諸老蓋無愧云銘曰物
稟靈異各擅其能鸞以德著鷗以威名惟德惟威兼備爲美
我求其人以立政軌憲憲郭公傑出之才鸞停于邑鷗擊于
臺在物爲祥于人爲異迄不我容乃與禍會能螫其身不挫
其氣考公始終庶幾無愧我之銘公蓋激于義祥歟異歟以
俟來世

清澗知縣趙臣墓誌銘

滁陽盧英

君諱臣字邦直姓趙氏樂菴其別號也先爲山西襄垣人國

初移籍肥鄉縣大父奉天順間儀真主簿父詠正德初河南鎮平儒學訓導君幼有穎悟資補邑庠弟子員爲文務明暢每得主司稱賞廩食者幾十年正德癸酉登順天府鄉試榜明年會試禮闈下第入太學卒業嘉靖癸未秋八月赴銓司授山西介休縣知縣介休素稱難治君有廉公聲期年而政修民服乙酉入覲授陝西清澗縣君素嬰疾視事僅兩閱月遂以疾歸君爲人和易而操不可奪與人交坦率而情真往往鄉間士夫稱其美兩作縣而歸囊橐蕭然尤人所難予聞諸鄉評常接其風采深嘆宦游而歸如君者真好消息豈易得哉歸時當鄉飲期生徒相與請而置之賓席鄉人榮之無

何疾篤卒銘曰仕以學殖駕言治生或有墜志假途僭縵會
如君志卓犖而勅兩爲縣令並有清明解組歸來蕭蕭騎鳴
考素履蹈久如鄉評胡爲不樂胡爲不榮學以仕敗視此誌
銘

鄉貢進士杜璧墓誌銘

滁陽盧英

君諱璧字天瑞世爲肥鄉人曾祖敞神武衛經歷父春鎮平
知縣二子長曰奎靜樂縣訓導次卽君也君資性穎異學問
精博少年廩食邑庠人皆以經解期之正德己卯中京闈鄉
試榜以數奇春官不售既而入太學嬰病卒聞者莫不以未
究其用爲恨君爲文操紙筆立就不事雕琢而理致雋永好

作詩取材漢魏律準李杜陶劉而不事蹈襲自成一家閉門
歌詠音韻冲雅如金石聲事親孝與兄奎共業儒食菜道
宛然蘇門對床風致也銘曰學務實匪以名時所趨名之成
君收桂籍夙協乎鄉之評負材而學弗究名立而用未形爲
我心惻泮而弗食虛王明吁嗟乎生睥睨一世如君之沒也

寧

贈太保潞安同知張應麒墓誌銘 吳郡申時行

司馬肥鄉張公旣受命則疆吏屢告急朝議洵洵余數從司
馬受壽筴靡不稱上意而邊師報捷滇師逐緬寇縛其渠魁
生致闕下上登樓受俘叙功首司馬加太子太保予誥得贈

其父西瀾公如其官母宋繼母陶皆一品夫人會陶太夫人
病草司馬七疏乞覲省上憐而許之歸未抵家而太夫人之
訃至司馬以聞有詔賜祭父若母偕所司爲治墓合葬于是
司馬以書來曰孤先子常仕至貳守其才志未及竟而以屬
孤孤之所爲公家毘勉分守者咸出先子子幸知孤其爲先
子及兩夫人銘而納諸隧孤死且不朽念不敢重違其意乃
許之西瀾諱應麒字時熙西瀾別號也先世故合肥人永樂
初徙江南大姓寔邢洺於是公高祖德山始家肥鄉一再傳
而曰嘉曰溥父子爲邑諸生溥生巡檢韶韶生訓導悅悅娶
于郝公之女也公生有異質東髮嫻文辭應明經選第一廩

學官貢入太學凡六試弗售乃嘆曰咄嗟夫士乃窮年矻矻而需一第何爲者謁遷吏部試高等通判潞安府兩考報最卽遷同知先是山西撫臣集民兵冀南請置潞安判專理主爵者廉知公才遂屬公郡倅領兵事自公始公至則汰其弱不勝戈者鈴束其強且好鬪者編隊伍飭器械明賞罰都御史會公銑下其事諸郡以爲式行縣高平令某遣人壽公金公庭斥之令嘖嘖避去閱兵偏頭關一切繩情卒不少借將領愴公謂衆且亂公不爲動兵亦竟莫敢譁已用撫臣議令公兼總理營田復豪右所侵地萬餘頃教民耕稼芻牧歲省內帑十餘萬潞多宗室驕亢難制公攝篆獨帖帖畏公甚于

守督餉平刑闢會賊突入卽移公保繁峙公誓衆堅守張疑
兵賊逡巡不敢犯諸使者皆相詫謂公才代州糴粟于商吏
多乾沒粟不辦監司檄公往諸商戒曰是不行苞苴者卽相
率輸如期州藏有千金翳塵土中守吏私公曰此藏籍不載
人無知者公叱曰爾勿溷我立籍其數諸使者又皆相詫謂
公廉嘗再攝郡按察司以私嫌公置下考大計落職諸使者
又皆相詫謂公才且廉奈何以睚眦罷公獨無幾微見顏色
飄然歸歸浹旬而司馬成進士知曲沃有卓異聲徵入諫議
會柄臣非斥異已者公貽書曰寧得罪而歸毋惕勢而辱司
馬竟蹇諤取忌補河南僉憲河南豪少年坐法各懷千金貽

公求釋公拒不納隆慶改元司馬以按察副使奉詔馳封公
尋病且革猶貽書司馬勉以立身成名語不他及既卒之三
月郡邑采輿論請崇祠學宮越四年而司馬任都察院右副
都御史以詔恩贈公如其官萬歷四年司馬以兩考贈公兵
部左侍郎又五年贈資政大夫正治上卿戶部尙書又三年
贈資德大夫太子少保兵部尙書又一年遂有今贈云余讀
華亭少師所爲公志以公詘于位不獲究其用深痛惜之乃
司馬兢兢守庭訓奉公砥節爲天子裕國安邊樹功社稷王
錫命而贈公八座余蓋知公不用之用大矣語曰厚積食報
信哉銘曰蒙泉之流溢而成川累構爲臺其崇造天犖犖張

公劬勞率職才足濟時位不滿德乃濬其源乃培其基是生
司馬式穀似之經國籌邊叩叩翼翼帝曰休哉予嘉乃績何
怙何恃有開必先何以恤之窳窳豆邊遇嗇于前榮施于後
不用之用食報孔厚崔嵬新阡將作是營刻詩于幽以垂厥
聲

博興知縣梁桐墓表

郭崇嗣

此博興令梁公之墓也梁公少負才名赫然流燕趙間乃弗
克大用而埋光以沒士林惜之嗚呼此余所以特表其墓也
公諱桐字子琴號竹坪生有異質年甫十一從師授業日記
數千言余大父御史公奇之及總角補邑庠生試輒優等郭

北五里許有田舍公夙夜讀書于中邑士多從之遊者嘉靖
丙午中順天鄉試主試者山東李滄溟也公爲人天性孝友
重義輕利承順二母不少違有姊適李宸而貧公收養于家
事以兄禮歲荒有夫婦就食河南鬻子于人而泣不忍離者
公哀而贖還之公幼善爲文章尤工告作平居博綜群書肆
力探討而于佛經粵義衆所齟齬者獨能妙解宗旨同遊者
皆自以爲不及也以數奇五試春官竟不第壬戌調銓授博
興縣令下車初有疏刁民數十人于公請繩之法公受而焚
之曰俟犯吾法當有處耳卒皆改行從善無懼法博地廣民
稀多不耕之士公立法委官分丈徵熟停荒不數月逃民畢

集而賦稅如限邑民趙秉科通竇尙智之女殺其本夫事出
晦夜前官以女之夫兄成獄已久公閱其招疑之因密廉賈
某者知其情設法問之賈不能隱竟坐秉科高苑縣地瘠民
悍每編審等則惟沿舊册民率不服公被委令一縣民盡詣
公所明定差役民遂翕然蒙陰縣賦重民逃乞公往平三日
而事竣云甲子當入觀民請立石紀政公却之曰增吾愧耳
公才力精銳廉明果斷蒞官八百日而兼理隣邑事過半治
績卓然爲列邑首兩臺先後薦剡者數次戶部以前令逋賦
註及例當改官百姓數千人赴臺保留然業不可挽矣公命
駕士民泣涕擁送百里外旣歸絕意仕進閉戶讀書不語外

月身集 卷三十三
事邑宰勺溪李公重公高致徵爲鄉飲大賓一應不復再出
卒年五十有八所著有潛軒集藏于家余憶督學良齋王公
當丙午校士取公與心齋張公及余曰此三生他日大器也
今心齋公開府遼陽進官司馬勲流竹帛余以庸劣亦濫湖
叅公獨抱奇位不滿德而逝豈非數哉

陝西副使郭崇嗣墓誌銘

張學顏

君諱崇嗣字承芳草塘其別號也其先河南鹿邑人御史郭
子東邑廩生君父也東無子而鄧之子繼先有二子長崇登
次卽君侍御公乃以君繼東後君生而穎敏有異質侍御公
鍾愛之比就外傳不假督責能肆力于學每試輒高等聲名

籍甚然入棘園則輒北遊國學四方士與君遊者皆重君舉
辛酉鄉試明年第進士除大理評事復晉寺副寺正遂繇考
績恩得封其父母如制復疏請旌王恭人貞節又請移封其
本父母隆慶丁卯陞河南按察司僉事分巡汝墳發奸剔蠹
執法無私乃尋以生母唐恭人喪請告歸再起河南驛傳道
署提學事所校士人人敬服治行爲兩河最癸酉陞湖廣叅
議分守衡永悉心措注務舉其職衡永人至今誦之擢陝西
按察司副使整飭固原兵脩固原當戎馬之交寇數爲邊患
公申法令訓甲士峻埤塹竝然爲西陲長城值王恭人喪扶
柩東歸服闋須次闕下當路者咸器重君思欲大用而君以

疽發背卒公尤長于古文辭詩法漢魏所著有燕石稿祥刑錄草塘文集等書行于世至于陳請二疏特奉允旨讀者無不下淚嗚呼君儻得竟其志所豎立尤有卓異者乃位浮于才壽弗當德惜哉然跡其表見於大理中州秦楚者亦足以垂不朽云銘曰謂君為良吏而君以文學鳴謂君為文士而君以吏治稱謂君當大受而君已返于冥冥鬱鬱佳城妥君之靈人號榮名何死何生其孰云吾道之窮噫嘻其令終

兵部尚書張學顏墓誌銘

任邱劉元震

大司馬張公勳望著天下而公在汴中與家君同藩臬相善尤夙聞之及不佞登朝公游大用中外敬歷所耳目公行事

有年矣不可謂不知公公令子承祚等以合葬誌銘請則安
得辭按狀公諱學顏字子愚別號心齋公先世爲廬州合肥
人共始祖德山自合肥遷廣平肥鄉家焉六傳至公父西瀾
先生應麟貳守潞安府皆以公贈封如其官母宋氏繼母陶
氏皆贈封一品夫人公生有異徵宋夫人夢顏氏子請于帝
大張氏門因命名及長孝友力學十六歲爲諸生高等督學
使稱奇往省潞安公經黎晉屬邑無一知者曰知而以餽遺
恩我受居貪名不受亦居廉名蓋自游黌校時已砥節如此
識者以遠大期之丁未應歲薦己酉舉順天鄉試第三人癸
丑成進士除曲沃令寬租省徭大有聲爲晉令冠值三殿災

應詔陳時務擢工料給事中卽疏奏大計謂承平久粹有釐武庫兵朽鈍不可用請除戎器脩不虞出爲河南按察司僉事尋改大梁平王瑟亂進遷山西布政司叅議守河東道冀甯南鄉流民作梗公威德招撫釋兵歸田萑苻絕警撫按交章薦公才可當鎖鑰進遷按察司副使潞安公訃聞奔喪哀毀廬墓側多孝感之異喪終起舊職飭薊州兵事會遼東羽書急朝議共推公堪秉節旄迺進擢僉都御史開府鎮遼上戰守機宜十策以功進秩右副都御史再考進遷都察院右都御史兼兵部右侍郎特召公京營協理自京營拜戶部尙書每詔增額外費公必封還諫止節高度支累鉅萬爲會計

錄以進欲上知天下錢穀數且言帑藏日積宜大免天下田租報可是歲免天下賦稅數百萬改兵部尚書中間諫止內操嚴門禁失中貴人意因借危言作歌上廉知事起門禁杖作歌者縉紳中有修舊隙知上怒江陵未解乃以劾江陵成妃故御史事連公謂希江陵旨公上疏自白撫遼時翼故御史甚厚都御史某用譎構陷上怒罷之公之心大自自然危甚矣昔伏波將軍奮不顧身破先零西羌平隴右降交趾老猶出雁門逐烏桓深入五谿褭革自誓功最鉅信任最篤而不能免惹苻謗誣雖以之武之明猝不及察公樹勳邊圉國倚長城出萬死宣力而瀕中橫口微公丹衷縉主知天日懸昭

鑒不幾爲馬伏波風哉立心正大慮事情詳故雖傾危難
不能動搖已丁陶母憂歸杜門守制服闋廷舉者四竟不起
惟以忠孝教子埒伏波風所著有撫遼議司農司馬奏議會
計錄經史補遺張氏家訓等書嗟于今士攘袂談天下事指
掌璧盡無難矣其惟任事衆任事疑爲寡斷獨任事疑爲自
專事未成慮爲難首事旣成慮爲投杼故國事難任心事難
白與其白心事無寧濟國事往往不能兩得談何容易歟司
馬公自嘉靖癸丑進士起家縣令至登八座直聲在諫垣旬
宣在藩臬勲勞在疆場德望在朝廷鞠躬盡瘁凡四十年其
間萋菲非一竟獨立成功功成謗解終其身聖眷不少衰非

文武壯猷忠貞亮節曷以臻茲余是以歎任事之難也銘曰
華胄書馨邁迹兩生臨胸潑安儲秀鍾靈司馬承之赫赫亢
宗允文允武克敏克誠風波傾公公亦弗傾維主上之明維
公之忠厥忠如愚深潛朗融佐邦揚烈靡爽神之錫名維偕
德斯儷並流鴻于九京

戶部郎中賀君恩墓誌銘

曲周劉榮嗣

公諱君恩字錫予號斗墟其先漢中之澠人公少穎異不屑
與群兒暱十四試于邑輒居高等先達翕然器之居父喪貧
不宿飽益攻苦問學曰將以此報生我敢自逸乎凡三羅鼓
盆之變日奉母親并爨夜焚膏讀書殘漏孤燈形影相弔有

人不堪其憂者每試冠諸生四方問字之履常滿戶外以公之教補博士弟子員者百四十餘人公乃收硯田代薪水朝夕展懽膝下癸卯中式爲本房冠偕計吏北上聞母病而返或謂暫留數日試事可完公曰方寸亂矣試亦不第卽第不以易病中一日養也母見公歸喜病小間曰病固竟死然以一握兒手爲快逾十月而卒公哀毀如居父喪所益感勵者養具粗備而弗能逮如窮人無所歸矣庚戌以乙榜署玉田縣教諭其教玉田士如及門受業士乙卯陞南國子監學錄其教國學士如玉田士師道立而善人多鄉國天下其義一也戊午陞南戶部司務時東西交訌徵求四出司農仰屋而

嘆計畫無之且以留都庫藏爲不時之需留都司農又屢缺前後署事者調度查覈倚公如左右手先是管水兌差者爲奸人所持包收包納糧解不堪其累大譁司農慰勞撫定問所欲得接管之人則曰願必得賀公司務前無管差例以譁故使公署其事公盡革囤頭買籌等弊出納以平諸軍糧解舉手加額曰從來水兌無如此楚楚也自是部中一切苦差如草場鹽政爲人所薄不欲試紛不能理者一切倚公公豁然辨之聲名籍甚辛酉山東妖賊起南薄徐州留都震動南司馬議兵北援諸軍擁馬首譟曰督糧者非賀公死且不往戶兵兩部會題公爲督糧道監諸軍事會賊平事寢八月

本部山東司郎中九月奉勅管理北新鈔關稅司物故一時
大猾乘機規利捏造揭狀投遞各衙門曰某利當興某弊當
革關政以蠱司農于公選擇而使不次及公而忌公者遂欲
借察典中公于公力解方已及就事稅務蕭條不當前者十
之二三蓋遼左未寧黔蜀告變加以山東妖寇爲梗淮陽以
下舟楫不通久矣公益與爲寬政蠲科罰除奸宄商旅皆悅
而願出于其闕報滿之日除完新舊兩額外仍完前任物故
者未結之局吁亦艱矣竟以此積勞殞身抑何清白自砥愛
以其身爲天下不以天下愛其身也又聞公公私束修前後
置田七百餘畝盡付伯兄族中不能耕以讀者多所周恤其

年某友不能以父喪歸里探囊得八十金悉以予之居恆助人婚葬小者不及概錄以公起家貧屢坎軻萬狀又好自修潔不欲爲苟受宜笥中無長物而樂與好施急公行義又如此此不足以盡公公可知矣銘曰學有餘爲人師自有餘澀不淄力有餘事以治世之儀國之維以開爾後之釐

藝文

傳

劉氏李氏同節傳

馮春暉撰

劉氏者明通州總鎮汝行張公之繼室國戚新樂侯之孫女也氏適公年最少公亡時甫二十八歲生子萬春方六歲氏雖貴尚勤儉謹樸不減鹿車家風曾公亡有家難惡姻欺其寡孤百端媒孽視爲儿上肉劉氏深閨婦又醇厚不識外事怯怯不能辨有無室李氏年方三十挺身控於上台終以直伸而家業幸無恙李無所出附於劉無彼此同居完節始終無間言教育萬春成立入邑庠前大名道扁旌二氏節勁

松筠劉七十八歲卒李八十一歲卒里人馮春暉爲之作傳曰二氏之節有三難焉語云由儉入奢易由奢就儉難總鎮公貴宦也二氏一旦守寒素茹苦集蓼有不能堪者若固有之一難也易曰二女同居其志不相得曰睽二氏同居一意守真相持如左右手有如葛藟之附樛木二難也二氏早年痛寡遭家多難百折不改其操撫育嗣子成立俱以令節終三難也爰合傳之以表幽貞云

藝文

祭文

胡盧營陣亡義勇耐祀武廟告祭闕帝文

成仁取義遐方共仰夫威靈捍患禦災衆庶咸叨夫覆冒况
捐軀而報國尤視死之如生無間幽明特申昭告胡盧營陣
亡義呂諧宮等勇期赴敵志切同仇方効力於疆場旋殞身
於鋒鏑天愁地慘冤固結兮難伸雨泊風漂魂歸來兮何託
幸邀曠典褒忠有待於

朝端得庇慈雲耐祀常依于宇下從此棠梨麥飯得招渙散之
游魂還期風馬雲車永護忠貞之毅魄

義勇祠祭文

代

趙文瀛

燕趙多悲歌之士慷慨從戎封疆思効死之臣春秋致祭率皆榮登仕版寵受軍符忠成於爲國捐軀典符乎禦災捍患未有盡殺身成仁之節氣奮聞閭竭見危致命之誠名標庠序者也惟爾附生呂誥宮等英才軼衆壯志凌霄素服習乎詩書亦相安於耕鑿文章彪炳銜華佩寶之功氣象崢嶸烈日嚴霜之概往歲山東倡亂邊鄙交訐輔車連失夫重城兵鋒獨當夫一面申息之北門不啟秦晉之東道難通選仗而武庫甲稀告警而紙鳶信斷本縣支持殘局保守危城除戎器以修戈矛勸鄉民以行團練爾等義深敵愾志切同仇應

募而願備瓜牙受命而如使臂指拔戟以成一隊不約而同
傳箭以徇三軍連村而至爰整義旅用挫凶鋒以如虎健兒
當封狼醜族一鼓作氣先登麾鄭伯之旗三刻踰溝超入躍
須陀之柵塵起而風雲變色礮開而烟焰漫空大旗奪而我
將皆飛短兵接而殺人如草行見功成掃穴績奏擒渠矣無
如右師先潰大勢難支四面重圍一軍皆墨猶復張空弮以
奮戰拾折戟以衝鋒胸洞公孫腸拖賈復酒萇宏之血化碧
而色已沈沈歸先軫之元如生而氣猶凜凜擒陳安而不得
十盪十挾以盤矛求丑父而無從三入三出以陷陣玉門關
裏我幸生還無定河邊卿猶骨曝文淵並無屍可裹馬革空

存子胥縱有恨難銷鯨波未靖褒忠大典尙有待於

朝廷死難精忠每縈懷於夙夜用是修明祀典創立祠宮俎豆薦

黍稷之馨節義靖兵戎之氣距冬至一百五日節屆清明設
神牌七十三人筵開整肅憑帝君作阿護淒涼之旅魄應憐
以武廟爲依歸渙散之精魂庶萃嗚呼執干戈以衛社稷僮
可無殤作厲鬼以殺賊人死猶報

國

肥鄉縣兵死難民祭文

代

趙文瀛

去歲釁開東省禍慘肥鄉血化碧以長留火連村而不斷爾
等或沙場効力一戰旋殞夫兵鋒或樂土移家半途忽遭其

劫奪或壯年裹脅前驅當鎗炮之衝或稚齒流離異地受劍
寒之困天飛冤雪魂漂泊兮何歸地慘愁雲屍縱橫兮誰葬
本縣撫膺切齒慘目傷心愧防剿之多疎慟瘡痍之普遍輕
徭薄賦災黎之撫卹維艱掩骼埋胔枯骨之收藏必謹當春
光之和煦憫旅魄之伶仃爰卽清明特陳牲醴一盂麥飯野
無祭兮餒而滿樹棠梨殞有宮兮渺矣馨香昭格聊擬騷招
夜月之魂閭里遄歸莫爲厲作他鄉之鬼

重修竇文正公祠堂告祭文

趙文瀛

崇儒重道明禮典重夫春秋立懦廉頑清德風高夫桑梓禁
樵蘇于柳下季處士之壟猶存森古柏于錦官城承相之祠

無恙此則神靈呵護典守攸司考故迹而煥然如新瞻遺容而肅然起敬豈有名儒憑式邱封半沒于蓬蒿故里瞻依廟貌將摧于風雨者乎恭維 漢卿先生生金之季值元之興

幼備歷夫兵荒長冒明夫道學隱居不仕紹伊洛之淵源聘幣而求等莘磬之出處宣猷潛邸敷陳首重夫綱常佐運開基渾一遂同夫區宇共姚樞機參帷幄稱一代之名臣與劉因道闢天人先北方之學者擎權臣王文統公論能伸荐正學許魯齊儒風丕振史天澤望隆將相遜此文章劉秉忠廣運機謀無其醇粹以故恩承寵眷福備哀榮賜葬而冢象祁運建祠而神來昭格三十畝護墳故地祀事祇領於儒官六

百年表墓豐碑遺文幸濡夫大筆無如時移勢易代遠年湮
此鄉屢被夫凶荒往歲又遭夫兵火烟荒隴斷僅餘馬鬣之
封日炙雨淋難壯翬飛之色墻垣頹敗厦將傾而一木難支
戶牖摧殘門雖設而雙扉莫掩工不可緩行路者且過而傷
心責有攸歸備官者敢視同隔膜乎濂博稽史冊臨文每企
夫高風忝竊微官司鐸幸依夫故國抵任在九秋之杪倉皇
之戎馬臨城致祭在二月初美富之宮墻墜地爰捐清俸
敬飭儒生代任監修重啟祠宇補偏救弊肅竹苞松茂之觀
舍舊圖新異刻栴丹楹之制經營而不皇告萃輪奐而不且
告成穀旦爰諏神牌恭設禮同釋菜蘋蘩蘊藻以明虔曲奏

迎神文物衣冠以肅拜取之不盡用之不竭祀田之餘粟能
供高其閘閼厚其墻垣故廟之舊觀頓復庶幾通微合漠神
來而得所憑依還期奮武揆文士習而咸知變化

各村遇害紳民入祀昭忠祠祭文

趙文濂

維同治二年十二月十五日主祭官陞署廣平府知府肥鄉
縣知縣楊致祭於入祀昭忠祠各村遇害紳民之神位前
曰慨自禍機早伏殺運將開隣省旣見其繹騷內地復因之
勾結蜂屯蟻聚方歆血以定盟豕突狼奔遂樹旗以舉事爾
等或偵探賊信而忽殞凶鋒或督辦鄉團而頓遭慘害或挺
身以罵舌雖斷而血可噴人或接戰而亡肢已分而屍猶投

火或搜求騾馬索未得而挺刃相尋或看守田廬避未能而操戈相向天如此醉人則何辜當胸洞而腸屠寔心傷而目慘二三年兵連禍結慨受害之有由六百人義取仁成知返躬之無憾不甘心以從賊卽爲

國以捐軀無忝忠貞宜隆饗祀本縣意存彰善祠建昭忠衆團丁慷慨捐生諸練長從容就義莫不據情申請

朝廷下賚夫

恩綸逾格

褒揚春秋特崇夫廟食爾等忠魂激烈旅魄飄零名已重於千秋事宜歸於一律爰諏吉旦洞啟祠堂當牲醴之羅陳庶精

靈之陟降嗚呼易言格廟合享萃渙散之神騷擬招魂屬節

體

褒崇之意

山東堂邑縣甘家屯打仗

陣亡哨官練勇入祀昭忠祠祭文

維

同治二年十二月十五日主祭官陞署廣平府知府肥鄉縣知

縣楊致祭入祀昭忠祠陣亡哨官耿德芳夏進德張金銘

及諸練勇之神位前曰勇期殺賊義取捐生苟昭果毅無忝

忠貞特隆饗祀聊表衷情咨爾秋夏爽露英英左右侍我竭

智輸誠敬能將事材可干城去歲寇亂遺孽潛萌干戈擾攘

聲勢縱橫爰練勁卒以備長征選爾領隊秣馬礪兵候聞警
報邊鄙皆驚傷亡練長潰散團丁一軍皆墨大厦將傾喜爾
機警克振軍聲戟揮紫電劍拭青萍塵飛日蔽礮震雷轟西
賢店外一戰功成今年正月許請長纓爰隨道憲以討不庭
戰香城固守善樂營洪流馬騫畫鼓雷鳴發無不中勝孰能
爭更隨藩憲戴月披星御軍能整按轡無停縣抵甯晉丕振
聲靈先登陷陣鋒莫敢撓爾蒙賞識我亦光榮迄乎三月隨
我戎翱整齊隊伍拱聽使令操演陣法務迪專精退嫺步伐
進整弓旌收降奏凱指日澄清豈期宋逆傲慢驕盈甘心背
叛矢願兼并制軍震怒威厲雷霆滅期一鼓令下三更卒備

勁旅刀發新礪旗旄赫赫燈火熒熒兵分八隊捧海澆螢田
禾正茂霖雨方零炎炎天氣渺渺郵程三軍暫駐一騎前偵
欲探消息再決輸贏前軍忽敗後隊方迎勢如山倒手莫天
擎爾衝陣入生死皆輕風塵暗暗烟霧冥冥殺聲慘切礮響
旬旬捐軀爲

國金鐵錚錚更可惜者張子金銘技嫻弓馬聲振庠黌誠竭丹
悃賞錫藍領頭銜進秩羽箭馳名館陶隨我患難同經陣當
逆散賊甚猙獰以死衛我獨力支撐此心可白有目難瞑更
嗟練勇爾本鄉氓因從軍旅暫舍鋤耕誓吞蛇豕欲戮鯢鯨
楚氛甚惡趙卒同阮魂飛月黑氣撼天青迄今凱撤我返公

廳妖魔小醜咸靖郊坰著名要犯悉正典型

天誅已伏爾憤差平昭忠祠建畫棟雕甍紛陳酒醴敬展牢牲禮
成一獻奠設兩楹迎神之曲鼓瑟吹笙栖神之所繪像圖形
幽明不隔俎豆維馨疇昔之夜人夢形呈音容慘淡肢體伶
仃守城氣奮爾念猶惺哀死語慟我夢微醒魂來渺渺心動
怛怛還請

卹典申奏

朝廷